

DIDZA' ZI'AL BUZUJĚ' LU GUICH PEDRO

Pedro rugapĕ' Dios nup ta'dá' Cristo

1 Neda', Pedro, naca' gbaz nasölĕ'ĕ Jesucristo. Ruzuja' queĕli' lu guich ni, lbi'ili' náslasli' zi'tu' gap dĕ ladzli', zoali' luyú Ponto, len luyú Galacia, len luyú Capadocia, len luyú Asia, len luyú Bitinia. ²Gröczĕ' lbi'ili' Xuzru' Dios ca na' bucözĕ' dza ni'tĕ quiĕ gáquili' quizi queĕ' lu nĕ'ĕ Dios Bò' La'y, len gunli' ca rna xtudzĕ'ĕ Cristo len gacli' gdu dxi'a ni'a qui xchönĕ' Cristo. Rnabda'-nĕ' Dios uzá' ladxĕ'ĕ queĕli' len gunĕ' ga soa dxi icj ládxi'dau'li'.

Le rúnteczru' löz

³Yöl-la' ba Dios, Xuzĕ' Xanru' Jesucristo. Lu yöl-la' ruhuechi' ladxi' zxön queĕ' bucubĕ' yöl-la' na'bán queĕru' le buspanĕ' Jesucristo lu yöl-la' gut. Lĕ ni run ga rúnteczru' löz, ⁴len gun ga gdĕl-li'ru' lĕ na' run chi'ĕ queĕru' Dios yehua' yubá. Lĕ na' run chi'ĕ Dios, le unödzejĕ' quegac bunách queĕ', cutu nit, len cutu gtĕb, len cutu ggul. ⁵Le réjlĕ'li' Lĕ', lu yöl-la' huac zxön queĕ', Dios gun chi'ĕ lbi'ili' cati' gdxinr dza ni' uzi'li' xbey yöl-la' ruslá gdu na'

chnupĕ'ĕ queĕru' len ulu'ĕ lahui dza udx.

⁶Qui lĕ ni na' rudzjįtsquili', zal-la' na'a ral-la' saca' qui'li' tu chi'idau' le rac zian le ta'zı' bĕ' lbi'ili'. ⁷Le rua' rlenli' yugu' lĕ na' ta'zı' bĕ' lbi'ili', nac bĕ' nac gdu ca réjlĕ'li' Cristo. Lĕzca' cni rzi' bĕ'ru' oro, le nit, runru' lei dxi'a lu gui'. Qui lĕ ni na', cati' chnazı' bĕ' yöl-la' rejłĕ' queĕli' Cristo, le nacr lsaca' ca oro, gac queĕli' yöl-la' zxön len yöl-la' run ba la'n dza ni' uluı' lahuĕ' Jesucristo.

⁸Lbi'ili' nadxi'ili'-nĕ' Cristo zal-la' gatga blĕ'ili' Lĕ'. Réjlĕ'li' Lĕ' zal-la' cutu rlĕ'ili'-nĕ' na'a, ati' rudzjįli'. Gdu nac yöl-la' rudzjįi zxön queĕli' le cutu gac quıxjö'ru' tsca nac. ⁹Cni nac, le rdĕl-li'li' yöl-la' ruslá qui bö' nacczli' le rata' queĕli' le réjlĕ'li' Cristo.

¹⁰Dza ni'tĕ gulusĕdĕ' dxı'adau' bönni' glu'ĕ didza' uláz queĕ' Dios ca nac yöl-la' ruslá na' dĕ queĕru' na'a, ati' glu'ĕ didza' ca nac le ruzá' ladxĕ'ĕ queĕru' Dios. ¹¹Bò' La'y dzaguĕ' Cristo buzĕjni'nĕ' zı'atĕl bönni' na' glu'ĕ didza' uláz queĕ' Dios, bului'inĕ' lequĕ' ca ral-la' saca' qui'ĕ Cristo, lenca' ca gac

queë' yöl-la' yení' töd na'. Qui læ ni na' glui' lãdxi'que' la'nöznë' batx gac læ ni len nuzxa na' gac qui læ na' bului'inë' lequë' Bö' dzaguë' Cristo. ¹²Dios bului'inë' bönni' na' glu'ë didza' uláz queë' cutu nac tu le la'lé'inë' lequë', san rë'u ni glé'iru' læ na' glu'ë didza' qui, ati' lbi'ili' ryónili' na'a ca nac qui. Læ ni tu'ë didza' qui bönni' tunë' lban qui didza' dxi'a, zoalen lequë' yöl-la' huac queë' Dios Bö' La'y, Nu na' rsölë'ë queëru' Dios zoë' yehua' yubá, ati' tē'nnë' gbaz la'y queë' Dios la'nöznë' ca nac læ na' glu'ë didza' qui dza ni'të.

Dios rulidzë' rë'u quië gacru' la'y

¹³Qui læ ni na', gul-zóa ban lãdxi' len gul-cöztec z ba'adau'. Gdu lãdxi'li' gul-zxöni lãdxi'li' læ na' uzã lãdxë'ë queëli' Dios dza ni' uluí' lahuë' Jesucristo. ¹⁴Gul-gún ca rna xtudzë'ë Dios len cutu güi'li' latj la'ché' lbi'ili' ga yubl yugu' le rzë lãdxi'li', ca na' benli' dza ni' cutu núnbë'nili'-në' Dios. ¹⁵Ral-la' gacli' la'y ca nac yúgu'të le runli', ca na' naquë' la'y Dios, Nu bulídz lbi'ili' quië gáquili' queë'. ¹⁶Lëzca' cni nayúj lu guich la'y, ca na' gnë' Dios, rna: "Gul-gác la'y, le naca' neda' la'y."

¹⁷Rëli'-në': "Xuztu'", cati' rulidzli'-në' Dios, ati' Lë', tuz ca rbequi xbeynë' yúgu'të bunách tsa nac le nungac tu tu bunách na'. Qui læ ni na' ral-la' gãdxi'li' Lë' tsal ni zoali' yödzyú ni, le cutu nac gdu lãdxi'li'. ¹⁸Dios buslé' lbi'ili' lu læ na' gucli' dza ni' cati' benli' ca nacgac le ca'z guludödë' lauli' xuz xtau'li'. Nózcizli' böa'uë' lbi'ili', clëg len tu

le nit ca nac oro len plata, ¹⁹san len xchönë' Jesucristo le nactër lsaca', le budód cuinë', guquë' ca tuba' bö'cu' zxila' nacba' gdu dxi'a, tu'döddë'-ba' lahuë' Dios quië ugúa dul-la'. ²⁰Dios gröczë' Cristo zí'atël ca benë' yödzyú ni, ati' dza ni zoaru' na'a benë' ga buluí' lahuë' quië uzi'li' xbë'. ²¹Ni'a qui le benë' Cristo réjlë'li'-në' Dios, Nu na' buspán Lë' lu yöl-la' gut len ben ga naquë' blau. Cni nac, réjlë'li'-në' Dios len ruzxöni lãdxi'li' Lë'.

²²Na'a, chnun cuinli' dxi'a le runli' ca rna le nac gdu'të li len nac gdu ca nadxi'icli'-në' böchi' lza'li' ta'yëjlë'ë Cristo. Qui læ ni na', gdu lãdxi'li' ral-la' gdx'i'li' lza'li' tuli' yetuli'. ²³Chböäljli' leyúbl, clëg le nuzoagac lbi'ili' bunách tatz, san nuzóa lbi'ili' Nu zoacz, le nãljlenli' xtudzë'ë Dios, le nac ban len le zoa tsalzú. ²⁴Cni nac, le nayúj lu guich la'y rna:

Yúgu'të bunách nacgac ca nac guixi'.

Yöl-la' lach quequë' nac ca xyiji guixi' na'.

Rbidx guixi' na' len rguindj xyiji,

²⁵San xtudzë'ë Dios zoa tsalzú.

Didza' ni bdxin queëli' lu didza' dxi'a.

2 Qui læ ni na', gul-cá'n yúgu'të le cunác. Cutur si' yë'li' len cutu ubj dxi'a cuinli' laugac bunách. Cutur uzxé'li', len cutu gnëli' qui lza'li'.

²Ral-la' së lãdxi'li' le nac queë' Dios Bö' La'y quië gal-li' ca na' tunbi' bi'i huë'ndau', ta'zë lãdxi'bi' nidxi'. Cni ral-la' gunli' ga gdxinr dza ulali', ³chqui' ráquibe'ili' naquë' dxi'i lãdxi' Xanru'.

Cristo naquë' ca tu guiöj nac ban

⁴Gul-biga' ga zoë' Xanru', naquë' ca tu guiöj nac ban. Naquë' ca tu

guiöj gulacá'n lei ca'z bunách san nac tu le gröczè' Dios le nac Isaca'.
⁵Lèzca' cni, lbi'ili' nacli' ca guiöj nabangac. Gul-güi' latj Dios ugunè' lbi'ili' dxin, gunè' ga gacli' ca tu gdaul' ga soè' Dios Bö' La'y. Lu gdaul' na' gacli' ca bxuz náquigac quizi queè' Dios ati' lu në'è Jesucristo gac udödlì' lahuè' Dios yugu' le runnè' queèli' Dios Bö' La'y, lè na' rdzag ladxè'è Dios. ⁶Qui lè ni na' nayúj ca' lu guich la'y, rna:

Rgu'a lu zö'ö yödz Siön tu guiöj blau squin zö'ö,

Le gröcza' neda' len nac Isaca'.

Nu rejle' Lè', cutu gchixi gnigui.

⁷Lbi'ili' na' réjlè'li' Cristo, nac queèli' guiöj ni tu le záqui'tsqui, san quegac nup cuta'yejlè' Cristo, nac ca na' nayúj lu guich la'y, rna:

Guiöj na' guluzóè' tsla'l bönni' tu'cu'è zö'ö,

Gláquinè' ca'z nac,

Guiöj ni chnac guiöj blau squin zö'ö.

⁸Lèzca' cni nayúj lu guich la'y, rna: Guiöj ni gun ga tsajchégu'gac bunách

Len gun ga tsajtsö'gac.

Le nactè yajchégu'què' bönni' cuta'yejlè'è Cristo, le gulachíxinè' cati' guluzóè' tsla'l xtidzè'è Dios. Dios bucu'è lequè' lunè' cni.

Nup náquigac queè' Dios

⁹Lbi'ili' nacli' bunách gröczè' Dios. Yúgu'tèli' nacli' bxuz queè' Bönni' Uná Bè' La'y. Nacli' ca tu yödz naqui quizi queè' Dios. Nacli' bunách queèczè' Dios. Cni nacli' quiè gac gunli' lban qui le zxön benè' Dios, Nu na' bulídz lbi'ili' quiè brujli' ga nac chul xöhui', len

gyazli' lu yení' gdu queè'. ¹⁰Zí'atèl cutu gucli' bunách queè' Dios, san na'a chnacli' bunách queè'. Zí'atèl nutu nu buechi' ladxì' lbi'ili', san na'a Dioscz ruhuechi' ladxè'è lbi'ili'.

Zoaru' nabanru' quiè gunru' ca rè'nnè' Dios

¹¹Böchi' lza'adau', nacli' ca bunách zì'tu', rdazli' yödzlyú ni. Qui lè ni na', ráta'yua' lauli', cui güi'li' latj la'ná be'i lbi'ili' le rzèz ladxì'li', lè na' ta'dil-len bö' nacczli'. ¹²Gul-gún le nac dxi'a laugac bunách cunúnbè'gac Dios. Cni gac, chqui' luquí lbi'ili', la'ná nacli' gdödi bunách, gac la'le'i bunách yugu' le dxi'a runli', ati' dza huödè' Xanru' la'gu'è Dios yöl-la' ba ni'a qui le nacczli'.

¹³Le náquili' queè' Xanru', gul-gún ba la'n yúgu'tè bönni' yúlahui', nucua'gac lequè' bunách, zal-la' naquè' bönni' rna bé'inè' gdutè yödzlyú, le naquè' bönni' blau uná bè', ¹⁴o chqui' naquè' bönni' rna bé'inè' yödz, nu na' nuzóè' bönni' blau uná bè' na' quiè gut quinë' nup tua' döl len gunè' ba la'n nup tun le nac dxi'a. ¹⁵Cni rè'nnè' Dios gunli' quiè la'bó' dxiè' bönni' cunözi cunúnbè'què' Lè', cati' la'lé'inè' le nac dxi'a na' runli'.

¹⁶Gul-gác ca bönni' nadzanquè', san cutu gugunli' dxin yöl-la' nadzán queèli' quiè gunli' le cunác. Gul-gác ca bönni' nadá'uquè' queè' Dios. ¹⁷Gul-gún ba la'n yúgu'tè bunách. Gul-dxí'i-què' böchi' lza'li'. Gul-gadxi-nè' Dios. Gul-gún ba la'n bönni' rna bé'inè' gdutè yödzlyú.

Le gzxaca' gdi'è Cristo ruzejni'i rè'u ca ral-la' gunru'

¹⁸Nul-li' nacli' bönni' nadá'ugac, gul-gadxi bönni' xanli', len

gul-gún-que' ba la'n, clëgz gunli' ba la'n bönni' xanli' na' nacque' dxi'a len tui' ládxi'que' lbi'ili', san gul-gún ba la'n ca' bönni' xanli' na' tu'saca' zi'ë lbi'ili' lu dxin runli' queque'.

¹⁹Chqui' saca' qui'li' len cutu zoa bizx quië, ati' gual' glenli' lë na' le ráquili' nac ca rë'nnë' Dios, urujli' dxi'a lahuë' Dios.

²⁰Na'a, chqui' rua'li' dö' ati' gut quinë' lbi'ili' bönni' yúlahui', ñnacxcz uzi'li' xbey zal-la' len yöl-la' rböz zxön ladxì' queëli' gual' glenli' lë na' gac queëli'? San chqui' rbözli' zxön ladxì', rua' rlenli' le rzaca' rgui'li' ati' benli' le nac dxi'a, ni'r urujli' dxi'a lahuë' Dios.

²¹Dios bulidzë' lbi'ili' quië saca' qui'li' cni, le gzxaca' gdi'ë Lëczë' Cristo uláz queëli', buzóë' queëli' tu le uluf'i lbi'ili' ca ral-la' gunli', saca' qui'li' ca na' gzxaca' gdi'ë Lë'.

²²Cristo cutu bi dul-la' benë', len gatga gzxì' yë'ë.

²³Cati' guludidza' yudxnë' Lë', cutu butság yudxnë' lequë'. Cati' gulusaca' zi'ë Lë', cutu buzeynë' lequë' ba nadx, san budód cuinë' lu në'ë Dios, Nu na' rbequi xbey le runru' ca sa'yéaj.

²⁴Lëczë' Cristo gzxì'ë dul-la' queëru' lu gdu ca nayá' nabanë' cati' ni' gutië' lë'i yag cruz, quië gacru' ca bönni' nat, cutur gunru' dul-la', san soaru' gbanru' quië gunru' le nac dxi'a. Lë' guquë' huë' uláz queëru' quië huóacru' dxi'a rë'u.

²⁵Gucli' ca bö'cu' zxila' nanitcaba', san na'a budxinli' queë' Cristo, Nu ruyú lbi'ili' len run chi'ë bö' nacczli', naquë' queëli' ca bönni' uyú bö'cu' zxila'.

Ca ral-la' lun nup nutság na'gac

3 ¹⁻²Lëzca' cni, lbi'ili' ngul, ral-la' gunli' ba la'n bönni' qui

queëli', len chqui' cutu ta'yejlë'ë xtidzë'ë Cristo, ta'yejlë'ë Lë' cati' la'lé'inë' le nac dxi'a runli', nacli' ba'a ladxì', len runli' lequë' ba la'n, zal-la' cutu bi didza' ru'lenli' lequë' ca nac queë' Cristo.

³Yöl-la' lach queëli' cutu nac le zoa lahuiz, tsca rupa'li' icjli', len tsca nacgac le naccni oro nusi' cuinli', len lari' záqui'tsqi naculi'.

⁴Yöl-la' lach queëli' ral-la' gac le yu'u icj ládxi'dau'li'. Yöl-la' lach le rdia'tecz nac yöl-la' nöxj ladxì' len yöl-la' ba'a ladxì', le záqui'tsquisgac lahuë' Dios.

⁵Lëzca' cni guc yöl-la' lach quecnu ngul gulayíj ládxi'cnu Dios, gulacua'nu dza ni'të. Guluzxöni ládxi'cnu Dios len glunnu ba la'n bönni' qui queëcnu.

⁶Cni bennu Sara, bennu ca rna xtidzë'ë Abraham, bönni' queënu, len bulidznu lë', gnanu: "Xan." Lbi'ili' ca' gunli' ca bennu Sara na' chqui' gunli' le nac dxi'a len cutu bi gádxili'.

⁷Lëzca' cni, lbi'ili', bönni', ral-la' güi' ládxi'li' ngul qui queëli'. Gul-gún lecnu ba la'n, clëgz le nóta'cnu ca yöl-la' nal queëli', san lëzca' le nadél-li'cnu yöl-la' na'bán na' runnë' queëru' Dios, tuz ca nadél-li'li' lbi'ili'. Gul-gún cni, cui uzaga' xnözli' tu' xöhui' cati' ulidzli'-në' Dios.

Huazaca' huaguí'ru' zal-la' runru' le nac dxi'a

⁸Ga ruúdxte, gul-gác tuz tuli' len yetuli' yúgu'tëli' len gul-güí' ládxi'li' lza'li' tuli' yetuli'. Gul-gác dxi'i ladxì' len zxön ladxì'.

⁹Cutu ubi'ili', cugua'li' dö' qui nu rua' dö' queëli', len cutu utság yúdxili' nu

utság yudxi lbi'ili', san cni ubi'ili', gnábili'-nè' Dios gunè' ga gac bica' ba nu na', le bulidzè' lbi'ili' Dios quiè gacli' bica' ba. ¹⁰Cni nac le nayúj lu guich la'y, rna:

Nu bönni' rè'nnè' uzi'è xbey
yöl-la' na'bán queè' len cözè'
dxí'adau',

Ral-la' uca'nè' didza' xöhui' len
cutur si' yè'è.

¹¹Ral-la' uca'nè' le cunác len gunè'
le nac dxi'a.

Ral-la' güi' ladxè'è cözè' zxön
ladxi' len sóateczè' cni,

¹²Xanru' run chi'è yugu' bönni'
tsahui'

Len ruzé' naguè' le tu'lidzè' Lè',
San ruzaguè'è xnözgac nup tua'
dö'.

¹³¿Nuzxa caz gua' dö' queèli'
chqui' rui' ládxi'li' gúnteczli' le
nac dxi'a? ¹⁴Zal-la' saca' qui'li'
cati' runli' le nac dxi'a, gacli' bica'
ba. Nutu nu gádxili' len cutu ubi
ugui'li' ¹⁵san gul-zxöni ládxi'li'-nè'
Cristo, güi'li' Lè' latj gna bé'inè' icj
ládxi'dau'li'. Gul-zóa sina' quíxjöi'li'
yúgu'tè nup la'nabi lbi'ili' bizx
quiè runli' löz Cristo, gunli' lè
ni lu yöl-la' nöxj ladxi' queèli'
len lu yöl-la' run ba la'n nup na'.
¹⁶Gul-guntecz le nac dxi'a lahuè'
Dios, len chqui' nacuá' nup ta'né
xöhui' qui le nac dxi'a runli' le
réjlè'li' Cristo, ni'r lutu'fi ca nac le
ta'né queèli'. ¹⁷Chqui' saca' qui'li',
dxi'ar gac chqui' nac le runli' le nac
dxi'a len clèg le rua'li' dö', chqui'
Dios rè'nnè' gac cni queèli'.

¹⁸Lèczè' Cristo gzxaca' gdi'è
gutiè' uláz queèru' quiè bugüè' tsaz
dul-la' nabága'ru'. Lè' naquè' dxi'a,
san gutiè' uláz queèru' rè'u, nacru'

bönni' dul-la'. Cni benè', bunè' rè'u
tuz len Dios. Lu xpèlè'è gutiè' san
lu bö' nacczè', ni zoè' nabanè' tu lu
xpèlè'è cub. ¹⁹Lu bö' nacczè' gyijè'
yjenè' lban laugac bö' nadzungac.
²⁰Bö' ni glacczè' bönni', dza ni'tè
guladá'baguè'è xtidzè'è Dios, dza
ni' zoè' Noé, cati' ni' glözè' Dios lu
yöl-la' rböz zxön ladxi' queè', cutu
busyudxè' lequè', tsal ni' benè' Noé
barco zxön na'. Lè'i barco na' gululá
nabábz bunách lu nis, glac xunu'
bunách, bönni' len ngul. ²¹Nis ni'
nac tu le ruluí' ca nac nis ga na'
rdilru' nis, le nac bè' nularu' lu
yöl-la' gut le bubanè' Jesucristo
lu yöl-la' gut. Lè na' rdilru' nis
cutu nac tu le run dxi'a le nacru'
lahuiz, san ruluí' rui' ládxi'ru' gac
dxi'a icj ládxi'dau'ru' lahuè' Dios.
²²Jesucristo bubenè' yehua' yubá,
yajchö'è cuit lè'è yubél Dios, rna
bé'inè' yugu' gbaz la'y, len nup ni'
ta'ná bè', len nup nadél-li'gac yöl-la'
zxön.

**Gunru' xchinè' Cristo, ugunru'
dxin yöl-la' huac queè' Dios**

4 Qui lè ni na', ca na' gzxaca'
gdi'è Cristo lu gdu ca nayá'
nabanè', lèzca' lbi'ili' ral-la' soa
cözli' saca' qui'li'. Nu na' rzaca'
rgui' le da' le nac dxi'a chbucá'n
dul-la'. ²Na'a su lau, ral-la'
gúnteczli' ca rè'nnè' Dios len clèg
ca rzèz ládxi'li' lu yöl-la' bunách
queèli'. ³Tsca'ti' gaz le chbenli'
chbenli', cutur gunli' ca na' tun nup
cunúnbè'gac Dios. Dza ni'tè benli'
yugu' le cural-la' gunli'. Gzè ládxi'li'
le cunác. Gzúdxili'. Gdöd bè'i güi'
gdáguli' len gyij ládxi'li' bdau' guiöj
bdau' yag le rgtutnè' Dios. ⁴Na'a,

tu'bannë' bönni' tunë' cni le cutur runli' tsaxxón lequë' cati' tunë' le cunác cni, len qui lë ni na' tu'tság yudxnë' lbi'ili'. ⁵Lequë' run bayúdx luluí' cuinquë' lahuë' Dios, Nu na' chzoa cuequi xbeynë' nup nabangac len nup chnatgac. ⁶Qui lë ni na' guc lban qui didza' dxi'a laugac nup chnatgac, nup na' Dios glequi xbeynë' lequë' cati' ni' gulacu'ë yödzyú ni, ca na' rbequi xbeynë' yúgu'të bunách. Guc lban lauquë' quië la'cu'ë lu yöl-la' na'bán lu bö'nácgacczë', ca na' zoaczë' lu yöl-la' na'bán Dios.

⁷Chzoa gdxin dza udx qui yúgu'të le dë. Qui lë ni na', gul-gác ba'a ladxi' len gul-spán ládxi'li' quië gac ulidzli'-në' Dios. ⁸Le runtë bayúdx, gul-dxí'i lza'li' tuli' yetuli', le chqui' dzagli' lu yöl-la' nadxí'i, gacli' sina' unít lauli' lza'li' tua' dö' queëli'. ⁹Gul-guí' latj la'cuá' lidxli' böchi' lza'li', len cutu gnëli' quequë'. ¹⁰Dxí'adau' ral-la' ugunli' dxin yugu' le buzá' ladxë'ë queëli' Dios, gáclenli' lza'li' tuli' yetuli'. ¹¹Nu bönni' runë' lna' lau, ral-la' gunë' lna' lau qui xtizdë'ë Dios, ati' nu bönni' runë' xchinë' Cristo, ral-la' ugunë' dxin yöl-la' huac na' runnë' queë' Dios, ati' ca nac yúgu'të le runli', gac yöl-la' ba queë' Dios ni'a qui le nunë' Jesucristo. Gactecz queë' Dios yöl-la' ba len yöl-la' uná bë'. Ca' gac.

**Le la'zaca' la'guí'i bunách
ta'yejlë' Cristo**

¹²Böchi' lza'adau', cutu ubánili' ca nac le ta'zí' bë'tsca lbi'ili'. Cutu nac le cunúnbë'gac bunách. ¹³Gul-dzjitsqui le dë latj queëli'

gunli'-në' tsaxxón Cristo lu le rzaca' rgui'ë Lë' quië gac udxjili' ca' dza na' huödë' Cristo, cati' glé'ili' yöl-la' yení' queë'. ¹⁴Chqui' tu'dzág yudxi lbi'ili' bunách le da'li' Cristo, bica' ba lbi'ili', le nac bë' zóalenë' lbi'ili' Dios Bö' La'y, Nu za' yehua' yubá. Bunách ni tu'dzág yudxi Lë', san lbi'ili' runli'-në' ba la'n. ¹⁵Chqui' zoa nu dzag lbi'ili' rzaca' rgui'i, ral-la' gac cni le dë'ë Cristo len clëg le naquë' gdödi bunách o gban, o bönni' huia'dö', o le yjitsë'ë ga yubl. ¹⁶Na'a, chqui' nul-li' rzaca' rgui'li' le da'li' Cristo, cutu ral-la' utui'li', san gul-cu'ë Dios yöl-la' ba le nazí' lali' bunách queë' Cristo.

¹⁷Chbdxin dza su lahuë' Dios cuequi xbeynë' bunách náquigac quizi queë'. Chqui' zi'al cuequi xbeynë' rë'u, ñnacxtër gac quegac nup cutún ca rna didza' dxi'a queë' Dios? ¹⁸Chqui' nac baníg lulá nup tun le nac dxi'a, ñnacxtër gac quegac nup ta'dá'baga' Dios len tun dul-la'? ¹⁹Cni nac, nup ni ta'zaca' ta'guí'i le rë'nnë' gac cni Dios, ral-la' lúnteczë' le nac dxi'a len ludödë' lu në'ë Dios bö' nácgacczë', le benczë' lequë' Lë' len runë' ca rna xtizdë'ë.

Pedro ruzéjni'në' nup ta'yejlë' Cristo

5 Na'a, ruzéjni'da' bönni' gul tun chi'ë lbi'ili' náquili' queë' Cristo, le naca' neda' ca' bönni' gul ca nacquë', len blé'ida' le gzxaca' gdi'ë Cristo, ati' guna' ca' tsaxxón lequë', uzi'tu' xbey yöl-la' yení' na' gla' lahui. ²Gul-gác ca bönni' tu'yú bö'cu' zxila', gun chi'ili' bunách na' Dios glu'ë lu na'li'. Gul-gún cni gdu ládxi'li' ca rë'nnë' Dios, len clëg le run bayúdx queëli', o le rzë ládxi'li'

dumí. Gul-gún xchinli' le ré'nizli'
³len clég le ré'nili' gna bé'izli' nup
na' nagu'è lu na'li'. Gul-güü' ládxi'li'
gacli' tu le ruluí' ca ral-la' lac nup
na' run chi'ili'. ⁴Cni nac, cati' uluí'
lahuè' Cristo, Nu na' nac blau uyú
bö'cu' zxila', gdél-li'li' tu le uzi'li'
xbey le gatga nit.

⁵Lézca' cni, bi'i cuidi', gul-gún ca
ta'né' bönni' gul. Yúgu'téli' ral-la'
gunli' ba la'n lza'li', tuli' yetuli', lu
yöl-la' nöxj ladxí' queëli', le nayúj lu
guich la'y, rna:

Dios ruzagu'è xnözgac nup tun
ba zxön cuingac
San ráclenè' nup nacgac nöxj
ladxi'.

⁶Gul-zóa nöxj ladxí' lu në'è Dios,
ati' Lè' uchisè' lbi'ili' cati' gza'a dza.
⁷Gul-cú'u lu në'è Dios yúgu'tè le
run ga ruúbi rugui'li', le rui' ladxè'è
lbi'ili'.

⁸Gul-gác ba'a ladxí' len gul-spán
ládxi'li', le zoa tu' xöhui', nu curle'i
lbi'ili' dxi'a, rda gdu zbi'il, nac ca
tuba' bédx guixi' rbódxya'aba',
rguiljba' nu gáguba'. ⁹Gul-gác
tsutsu ca réjlé'li' Cristo, len
gul-zaga' xnöz tu' xöhui', le nózili'
ta'zaca' ta'gui'è böchi' lza'li' gdutè
yödzyú ni ca na' rzaca' rguí'li'

lbi'ili'. ¹⁰Ni'r cati' chgzxaca' gdi'li'
tu chí'z, Dios gunè' ga gacli' gdu,
len ga gacli' tsutsu, len ga gal-li',
len ga soali' tsaz. Léczé' Dios ruzá'
ladxè'è queëru' yúgu'tè le ruzi'ru'
xbey, len bulidzé' rè'u quiè uzi'ru'
xbey yöl-la' yení' queè' zoa tsalzú le
nacru' tuz len Jesucristo. ¹¹Gactecz
queè' yöl-la' ba len yöl-la' uná bë'.
Ca' gac.

**Pedro ruzeynè' didza'
nup ta'dá' Cristo**

¹²Dídza'dau' ni ruzuja' queëli' lu
guich lu në'è Silvano, len ráquida'
naquè' gdu bóchi'ru'. Rè'nda' utipa'
ládxi'li' ati' runa' lna' lau lauli', le
nactè lè ni nac le ruzá' ladxè'è
queëru' Dios. Gul-gác tsutsu le
ruzi'li' xbey lè ni.

¹³Tu'gáp lbi'ili' Dios bunách queè'
Cristo nacua' Babilonia. Dios gróczè'
lequè' ca na' gròè' lbi'ili'. Lézca'
rugapbi' lbi'ili' Dios bi'i Marcos,
nacbi' ca zxi'ncza'. ¹⁴Gul-gáp Dios
lza'li' tuli' yetuli', len lu yöl-la'
nadxí'i queëli' lza'li' unída'li' lza'li'
tuli' yetuli'.

Rnabda'-nè' Dios gunè' ga soa
dxi icj ládxi'dau'li', yúgu'téli' na'
náquili' queè' Jesucristo. Ca' gac.